



謹齋詩稿

淮海 許志進

丙申年下

甘雨行爲吳中丞用天扉韻

東南十郡甘霖無蘊隆
蟲蟲苗已枯誰哉滂沛一
夕蘇中丞湛恩具區如此
事不係師與巫閉陽縱陰
言則迂以誠叩天天心孚
爲政寬仁秉廟謨惠風披
拂時雨敷請天三日奔走
劬君子愷悌綏此吳豈無
他者禁屠沽人爲旱魃天
糶糊我昨冒雨來吳趨詫
天雨玉復雨珠行看千里
黃雲鋪祝者於野歌於塗
餒得公食寒公襦



吳人忤舞歌且呼撞鐘伐鼓吹笙等祝公眉壽公樂乎
重晤旭山感舊因懷馬方伯

旅館孤燈風雪深金陵舊事恨沈沈天昏牛渚然犀手
濤捲蛟宮拔劍心意氣相看猶夙昔恩讐默記到於今
重逢茂苑人如夢濁酒清歌感越吟

七月二十七日作

夢醒纔過閭闔門依依此日倍銷魂虎丘一叩貞孃墓
秋色蕭條斷碣痕

尊一招同紫裕放舟楓涇邀文師攜琴同叩慈雲
菴訪張姬消息籃輿登嶺訪支硎詩僧需亭不

值坐綠竹軒聽文師操烏夜啼一曲却並吳墳
探桂小憩法螺菴轉化城聽寒山雪瀑入定山
寺觀古梅因拉霜洲大師同上空谷亭望上方
諸山暮下天平小嶺遊上沙陸園而還飲尊一
新堂夜半別去回船作七詩爲寄諸寺詩附焉
時七月廿八日也

朝發金閭船弭櫂仍虎嘯詩人有佳招復作支硎遊天
清秋氣高竹木陂塘幽輕舸十餘里水冷江楓稠窈窕
攜琴僧碕岸同淹留一菴轉濬壑虛室占清修美人消
息沈悵望凝雙眸牀幃換紈羅枕蓆恣夷猶十年陽臺

夢冶思慈雲收空令白髮客爲爾心悠悠感茲幻泡緣
如對雍門周山翠遠相迎且縱沙棠舟

張姬南
村故人

溪流迴曲港山橋礙遊舫花外走復輿軋軋平頭壯挂
琴復載書林莽絕塵埃蹒跚陟遙嶺奮袂雲霄上秋色
染晴嵐嫵媚劇難狀冷翠挹鬚眉烟光迷洗漾諸峰一
蓮花瓣瓣攢青嶂長松十萬梢挺立互爭讓高棧迥凌
風巨石列橫障林巒面面殊舊識徵遺忘琳宮開翠巖
彷彿支公創臺殿鬱崔嵬十載重遊暢清陰冷竹房禪
老知何向

幽情寫蕭槭逸興寄瑤琴清清雲壑思泠泠山木音佳
人怨遙夜烏鳥啼空林山僧方少年已証聞思心感茲
空寂意塵想消煩襟捨琴遵川陸雜樹鳴秋澗素葉繪
丹黃桂粟香森森茶果法螺筵木石寒山岑孤亭俯飛
雪冷響知山深憑弔天水翁烟草同銷沈空山留勝蹟
風雅杳追尋何不調冰絃一和哀蟬吟

支公愛禪定遺蹟留巉巖我尋白馬踪來聽松枝譚入
門兩古梅挈攬臨秋潭豈其道林植千載依瞿曇歲寒
冰雪姿鐵幹橫烟嵐山僧亦詩流揖我雙樹南相邀坐
磐石餅軟兼茶甘雲壑相勾留何時結茅菴伊人自空
谷泉石娛清酣言登木杪亭縱眺天水涵金庭隔左神

擬挾飛仙探山高日欲暝吟望興方耽此遊得已多不
去毋乃貪

攜僧陟天平落日下烟嶺林林萬笏立轟轟千夫挺松
陰有高墳清風映重冥雲山傳老范陂田餘百頃高誼
今何人綱常手爲整山外靈巖寺孤塔卓高影響屨望
西施翠黛顰以靚豐碑表蘄王墓道秋山冷人言吳泰
伯古隧迷幽壙感念弔興亡今古意耿耿山僧莞一笑
令我發深省快訪名園路曲折尋箕穎一徑木犀香臨
風默自領

名園當谷口一水紆以曲到門松桂長香氣襲衣服小
橋穿碧沼虛堂蔭修竹迴環八九處幽勝悅心目樓因
聽雨開亭爲觀荷築茅茨學田野藏春構金屋主人定
何如今我歎幽獨一編韋蘇州却對深花讀興來呼尊
酒斟酌對寒綠佳山與名園是處堪留宿何事却回橈
晚興戀巖麓

停船理清遊得此山水樂登頓亦云勞詩思滿雲壑新
堂邀盡醉燈燭照簾箔主人興不已洗盞還更酌訂爲
十日留深山事磅礴銅坑鄧尉間桂海香繹絡我行殊
匆匆惆悵向林薄山僧惜分手爲我操別鶴子喬飛仙
鳧言向金陵郭萍踪感聚散把酒思轉惡名山豈不懷

夙志渺棲托攘攘歎塵緣幾度傷離索此遊留未盡待
踐探梅約

山中

溪平雲自流蟬噪林逾靜竹外一僧來斜日秋山影

支硎寺

鐘聲出古寺一徑轉喬松山簇青蓮藟僧留白馬蹤彈
琴蔭修竹禮佛上高峰挂壁閒瓢笠支公不可逢

法螺菴

樹石隱迴坡名菴認法螺秋山當戶碧流水到池多茶
果留三宿雲巖占一窩返魂梅幹古枝葉任婆娑

化城菴

雪瀑穿林響邀人入化城茶香僧有韻石瘦水餘清亭
榭前賢蹟雲山再到情寒濤聽不足一谷晚烟平

定山寺

入門啼鳥寂秋色照毘曇松塵延清話梅龍浸古潭名
僧詩有癖林壑暮同探遊倦吟歸寺雲巖閉一龕

贈文上人

煙艇碧流通尋師到梵宮花香迷徑曲潭影照人空詩
趣雲山裏琴心絃指中夜分成惜別秋月冷江楓

陸園留贈主人

薄暮興難盡名園景物幽樹深迴曲沼花密倚危樓詩
愛韋公淡人如谷口遊主人不相見迴棹水悠悠

懷呂逸人

梅隱名菴未一過幽懷特爲逸人多孤山鶴伴君空老
野史亭開意若何十道志成搜險隘九州箴在正傳譌

君著方輿續
考頗稱該博

何當却踐論文約木落江天秋水波

無題戲和南村四首

可許蘭舟着箇儂海棠挹露柳含風夢從五夜孤眠得
事與三生一笑同賸欲招遊成怏怏深憐此去太匆匆
鄂君繡被他時意山木愁心寫怨工

石城思泛莫愁舟江月芙蓉憶昔遊乍軫老奴新眷戀
長懷小玉舊綢繆天河且訂經年約客路難爲一晌留
膝上可憐雲鬢亂未妨三日不梳頭

破瓜碧玉小腰身知是湘娥定洛神月窟雲峰看寂寞
風萍水柳恨清新不妨妄語爲真語可得詩人傷麗人
西子五湖煙浪闊空煩岐路訪迷津

閨闈重來又隔年扁舟一葉興茫然聽歌不向旗亭醉
挾瑟空調少婦絃往事真揮鄰女淚清詞合奏想夫憐
無題和就情多少珍重平生半面緣

秋遊詞四首

山塘幾日桂花秋女伴相攜朝出遊斟酌橋邊水痕淺

儂船剛拂牡丹頭

吳中船頭板屋
獨高名牡丹頭

儂自清歌引曼長郎船吹笛倚新腔芙蓉塘上柳風晚
好與儂船相並行

沙頭秋水三尺高遊女生憎鬻斗橋竹兜鴉軋昇儂去
惹郎隨路相輕挑

謝宴嶺頭秋日晴觀音山上辦香情日斜更上靈巖寺
愛踏西施腳跡行

冰玉

楊柳風多碧水涯千門冰玉鬪如花吳閭一帶銷魂路

行到蓉溪又日斜

夜泊蓉溪寄王同年疊前韻

金閭久作賈胡留更向蓉溪夜繫舟錫麓數錢空覓酒
東林秉燭失追遊幾回萍水違談笑十載山堂記勸酬
月曉鐘鳴搖櫓去懷君辜負桂花秋

蓉溪朝發

香稻新炊黃雀肥泉甘酒美對清暉畫船牽過龍山道
如此風光不擬歸

凌亭道上寄懷吳中遊好

潮湧江流入港渾毘陵依舊水車喧帆迴岸曲疑無路

樹轉橋通更有村山到丹陽連地肺鴈來京口過吳門
雲嵐秋色園林酒夢繞歸航一愴魂

奔牛舟夜

月黑金牛道繁星曲水隈酒香村市暗潮冷客船回聒
耳蛩爭語停雲雨不來勞歌踏車子深夜最悲哀

延陵季子墓

泰伯逃荆蠻文身開吳基弒逆遠魚炙讓德邈難追嗚
呼子臧節札也緬遺徽當其聘列邦稱予猶為夷蠻方
無周樂公子安知之尼父不到吳何時表豐碑我於季
子墓望古空傳疑蘇臺麋鹿游光乎徒爾為

過丹徒鎮

曉露零衰草輕舟溯白波秋聲風樹得日氣水牕多山
出橫京峴潮來滾孟河一瓩茶事早幽興看漁艇

東林書院

東林俯溪流龜山奠遺址高顧懷名賢書堂傷清泚朋
來集同氣道義相礮砥云何僉壬仇黨禍倏焉起嗚呼
光熹間天道浩難理恭顯柄中書騰甫干國紀女謁甚
趙嬈攻擊劇牛李忠良羅織盡國是亦摧毀空令後代
人灑淚向青史我來當清秋林木蔭階屺豈無蘋藻薦
浩歎緬風軌悠悠百年內人事多倣詭標榜程朱匹趨

步蹻蹻跬矯情飾厚貌僻行乖倫理衣鉢傳後進牽挽
致委懼為風教累豈曰東林揆仰止思古人憑弔感
波靡

贈相士二首

猿臂空傳飛食肉禹肩曾類犬亡家獼猴麟閣真何物
鼠耳獐頭且自誇
水鏡從聞識臥龍天津鬼語詫衰翁人間富貴尋常事
捉鼻居然笑謝公

丹徒別友

江水悠悠倦客情丹徒泊處暮潮聲共君且醉新豐酒

明日瓜洲是別程

江上寄內

夢斷難為久客心河魚渺渺信沈沈天荒四郡多時旱
雲暗三山一半陰橫笛臨風江岸酒高城隔水女郎砧
飛空明鏡刀環思極目秋霄塞鴈音

瓜洲

驅石為塘敵怒濤瓜洲圍護一週遭安瀾自有司空策
滄海何須斷六鰲

遊金山寺四首

重過金山歲月深輕舟破險一登臨江天萬里自潮汐

臺殿千門空古今下界風帆看浩蕩上方秋日迴蕭森
西津北固驚濤裏寂歷浮屠替戾音

天風槭槭樹蕭蕭虛碧亭高動晚潮隔岸楚山秋日淡
到江吳地海波遙三乘淨業僧誰證六代興亡蹟未銷
廣廈萬間明鏡裏蛟鼉蹴踏任宣驕

挾天奎藻轟山門第一山川此地尊六度魚龍迎翠輦
十年虎豹守重閣盤空鷗鷺橫秋影出寺煙雲化水痕
形勝東南鐘梵古渚檣沙鳥閱朝昏

海岸千峰控石城山河掌上辨縱橫江搖佛座含風力
雲護僧房雜雨聲戰艦沈沙何代物畫樓吹笛野人情

禪牀玉帶空陳跡七載重遊白髮生

過揚州偶書二首寄所知

侍女偷傳韓掾香春光漏洩鬱金堂分司御史休相恚
已縱游蜂出院牆

貪名黷貨巧能兼天厚淫人不偶然賴有綠衣分訪客
香囊銜愧到重泉

過平山堂憶紅橋舊遊諸子

禪智荒岡路秋尋復此年樓臺空翠裏雲樹遠江邊憶
共山堂醉還烹蜀井泉上方僧寺古碑版捫寒烟

草淺山仍綠林深樹欲紅園亭秋水涸歌吹竹西空畫

舫蓮塘酒琴僧柳浪風昔游纔幾日重過興難同

讀唐宮閨詩雜詠三十二首

桃偷面色柳身輕上苑春遊足冶情聞道六宮師女則

后妃貞觀總芳名

長孫皇后
徐賢妃

上陽流水載君恩腸斷鶯花為早春多謝題詩勞顧況

感教天子放宮人

天寶
宮人

二南風範謝娘姿寂寞長門奏賦時一斛珍珠明愛惜

空煩樂府寫新詞

江采蘋

數寸輕縑繡法華纖軀竟日飯胡麻仙姝不是人間物

嶺海吹笙泛紫霞

盧道遙

錦傘風流娘子軍海天戰勝捷書聞新羅士女才多少

試看璇璣織錦紋

新羅女主
金德貞

宋氏才高女弟兄尚宮學士有詩名鮑姬一曲關山月

解道風多暈更生

宋五女
鮑君徽

剡川魂夢暗相親禁掖難將別恨陳箴策吹殘回鶻怨

傷心特為大郎神

掖庭士
人妻

戰袍添線更添綿手締沙場戍客緣惆悵三千宮女淚

白頭空老悞嬋娟

開元
宮人

兩兔焉知雄與雌何人解撰木蘭詞拂雲堆上思歸女

消得司勳杜牧詩

木蘭

慈教能成彥輔名孤忠不畏點青蠅海雲江水遺詩在

合與王陵母並稱郭元暖妻林氏

險韻聯成錦不如無人麗句續楊漁宋家姊妹如相見

定讓宮中女秘書光威哀

金風玉筋怨空幃白草狼烟戍不歸吟到羽仙邊將句

令人腸斷為征衣裴羽仙

寒到君邊衣到無西風吹妾妾憂夫不須話盡千行淚

便是邊關鄭俠圖陳王蘭

蘇秦富貴漫誇張知道浮雲欠久長可惜厨椒餘八百

不教開閣禮賢良王韜秀

山蜀棧與雲齊河北淮南客路迷君但遨遊甘寂莫

人生惟有杜羔妻杜羔妻劉氏

燕子樓空伴曉霜寒宵真為一人長牡丹風弱花枝弱

紅粉成灰斷客腸關盼盼

自歎多情是足愁況當風月滿庭秋憐渠大似江邊柳

翠色烟光繫客舟魚玄機

褒姒亡周禍水長老尼遺範煽草楊看朱成碧相思曲

不似關雎第二章武壘

漢主依稀解珮時落花愁絕寄人詩香殘枕冷春閨夢

燕語鶯啼總不知龍城公主

龍池節晦夜珠來夢裏曾量沈宋才不識崔郎才幾許

空從韋后一悲哀上官昭容

馬嵬魂魄殞宮荒南內秋風感上皇羅袖動香香不已

何如飛燕倚新妝楊玉環

並蒂蓮開有報書枕邊梧葉雨聲疎玉梳金鏡蘭膏膩

却是桐花鳳不如晁試鶯

銀燭清尊空有期星河欲曙鵲飛時仙鳧隔斷西江水

淚濕秦箏知為誰姚月華

花欹柳弱曉風前簫史初逢不羨仙人為多情甘一死

香囊蟬錦悞非烟步非烟

戀恩空錄出門詩較勝紅綃手語時絕代佳人矜色藝

及時合贈杜分司崔紫雲

章臺柳色舊青青排闥人歸自許丞何似李姬輕節度

上元紅帕認鴛燈章臺柳

盈盈年在破瓜初兩福丰標玉不如豈謂泥蓮移不得

紅巾腸斷數行書王宜之能之

越妓妝輕透額羅鏡湖春色感人多未知金縷秋娘曲

得似江船斷纜歌劉采春

笑厭三臺盛小叢越樓清嘯激秋風尚書蓮幕多詞客

麗句魂銷錄別中盛小叢

采春息女擅歌詞占斷風流楊柳枝若比旗亭爭畫壁

黃衫無力唱温岐

周德華

歐陽魂斷縷金箱

歐陽詹

光業蒲鞭厄潤娘巫峽不生神

女夢西山處士故難量

蓮花女

萬里橋邊女校書翩翩文采照簪裾錦江膩滑蛾眉秀

除却文君盡不如

薛濤

秦郵道中

風急柳蕭蕭秋晴氣沈寥孤城橫遠岸千柱斷危橋帆
走長河直天懸古塔高蟹肥菱芡足沽酒興滔滔

舟夜

漁標蟹斲幾燈明漕水悠悠倦客情一夜北風驚夢醒
繞隄蘆荻亂秋聲

報玉岑

海天秋月上弦時倦客言歸畫舫遲為報蘭閨先置酒
桂花深處讀新詩

中秋雨夜示玉岑

中秋無月嬾銜杯錯落明燈瑩燭煤香汎桂叢花正濕
風吹寒雨雁初來但將吟嘯酬佳節且緩笙歌送煖醅
坐共素娥尋舊約廣寒雲影夜深開

附錄和詩

畫樓微雨坐傳杯灼灼明燈噴麝煤雲月稍移疎影
出梧風暗寫嫩涼來香多結子宜金粟醉後賡詩怯
玉醅麗句君從蟾兔約珠簾來夕為重開

八月十六夜月

冥冥昨宵兩團團今夕晴陰凝宜用晦雲淨自生明影
落高梧冷聲流過雁清還看時序改來夜異虧盈

訓晚耘招集花下之作

句拙何堪佐舉杯深煩乙夜剪燈煤

時方校余尊鱸集東云誦一
詩斟酒一杯更深燈蕊結青

煤雲山偶為尋秋出杖屨還因看桂來花氣濃侵蟾窟
影酒香分餉蠡湖醅素心容易成高會觸撥吟懷又此

開

鮑烈女墓在邑南門外近齋令君表而祠之因有

此作

鮑許聘貧士將嫁而夫亡誓以身殉不可得既復改字富室鮑
不從父母強之伴許諾乞祭夫墓然後嫁從之乃密以膏油
漬中裙至墓設祭焚楮火熾投身烈
焰而死秦聞旌之明萬曆間事也

一杯馬鬣路人知黃土埋香姓氏垂猛火不傷真玉性
雙鴛常宿古松枝綸絲舊表烏頭闕碑版誰工幼婦詞
多謝令君風勸意百年遺蹟有新祠

雨中

早久陰凝積雨來閒庭深綠漬寒苔殘荷敗盡秋風裏
且有含滋晚桂開

王貞母哀詞

鳳凰將九鷦遙遙千仞翔雖離丹穴巢和鳴自鏘鏘老
鳳忽長逝哀怨遺孤凰求食哺諸鷦拮据手口傷大鷦
理毛衣五色豐文章次亦揚好音開口諧宮商羣小何
啾啾有味未退黃一雌匹文鸞刷羽隨鵝鷦無端中路
死阿母摧肝腸此鷦復有鷦哀哀鳴其旁桐萎竹不實
飢餒行且僵杜鵑空思歸啼血望故鄉鴻雁空銜蘆水
國稀稻梁我鷦且卑飛飄零不成行悲哀向中夜阿母
嗟云亡諸鷦哭失聲蹕踊同踉蹌相顧不飲食毀瘠羸
以尪夜聞反哺烏號泣呼穹蒼穹蒼豈不聞天命靡與

飄總帷冷雨鳴燈光匍匐求所生音塵都茫茫
西郭墳蕭蕭吹白楊誰無怙與恃屺岵思方長疾
風鍛病翮弱草殞嚴霜且復節悲哀飲啄依池潢鷹隼
攫霄漢燕雀捨榆枋終看雙鳳雛奮起鳴朝陽

飲文會齋雙桂下

看盡吳天桂仍尋靜者居千林薰碧落兩山襲衣裾痛
飲南潯酒休談北闕書座客偶及上書事依然香國招隱亦吾
廬

醒未惠丹桂一樹賦謝

金粟自森森晴霞上碧林天香凝絳雪海日照丹心品

是淮南冠秋先虎阜尋夜光樓畔月分我對清陰

晚桂

兩樹全含蕊開當月下弦漫言秋事晚猶在菊花前遲
暮馨香鬱移栽地力偏自饒辛辣性結實向霜天

得蘅臯侍御書適與木公夜話因用蘅臯贈木公

韻寄懷二首

憲府清霜滌柏林烏啼遙夜感秋陰三年鳳闕孤臣遠
一紙魚箋別思深白簡抗言矜直節清樽舊雨憶同心
雄談快對徐公子醉誦神羊一角吟

西風舉扇障塵氛往事虛傳對仗文黨論未成公論在

諫書何補謫書勤雲山歲晚頭空白江海懷人酒不醺
射虎短衣猿臂健霸陵還識李將軍

題梁少府照二首

范陽毡笠鬱金袍骯髒英姿認佩刀簿領纏身應失笑
青萍空瑩鷓鴣膏

虎頭燕頤不封侯火色鳶肩自馬周七尺眉鬚長劍在
陋他麟閣著獼猴

訓稼登中舍

幽葩吐晚桂芳馨足自娛開徑集朋歡清醑滿玉壺同
調二三子談笑興不孤粲粲庭菊黃千花共一區相對

不暢飲花鳥嗤人愚况當秋氣深幾卉猶紛敷陶公東
籬姿晚節真吾徒五斗與一石意適誰能拘老兵得不
憾吏舍同謹呼紛紛軒裳榮花間非所須蟹螯將醇醪
醉鄉風味殊

即席走筆戲贈鍾生自韓兼調巴生長歌

人生絕技誰能多鍾生三妙畫印歌引聲試作江南弄
匏絃竹肉音相和同調巴生柘枝舞驚鴻神彩翩無主
飛燕身輕漢殿仙巫娥夢斷陽臺雨學士華筵共酒卮
幾年江海一相思無端此會成聯璧九月僧房對榻時
層巒疊嶂空堂起潑墨淋漓畫秋水花木竹石各有態

石谷南田爭別派就中小印鈐紫泥庚庚瘦玉龍夔跬
新詩磊落字遒緊也與名流鬪工敏可憐此道久榛蕪
烏蛇黑鴉兼墨豬若向時賢論鐵筆非古非今竟何物
鍾生印譜遠擅場小篆似欲追元常屈伸變化存古法
匠心獨運昆吾鋼巴生語我技奇絕鍾生用鐵如用筆
我謂詩書畫盡然須教用筆如用鐵鍾生擅名餘十年
能令識者爭流傳許將幾幅澄心紙揮毫爲我招雲烟
尊酒相看豪興發更聽清歌遏寒月天香繞座浥流霞
烟篆游絲裊齒牙迷離醉眼巴生曲畫出鍾生沒骨花
賞菊聽歌和晚耘因贈端士

名花兼麗曲留戀怕更闌菊豔知秋晚歌長忘酒寒玉
簫憐倚和蘭露許同餐子韓吹簫倚曲
晚耘烹茗解酒醉醒流清韻餘芳沁
舌端

誕登寺贈僧

枝筇黃葉徑野寺落成餘臺殿看神運莊嚴象地居秋
林對寒菊塞饌擷園蔬詩味通禪味跏趺論讀書

清江暮歸

返照沈山寺疎林起夕烟人歸河畔路僧趁渡頭船弦
月靴紋水秋風雁陣天篋輿三十里燈火照城邊

楊孝廉生子招集新堂

是日
重九

熊羆徵吉夢堂構定新居高會重陽得佳兒大壯如無
功湯餅客錯寫弄璋書共醉茱萸酒題餽興不虛

離席四首

聽徹尊前婉轉歌酒酣無那別愁何楚天烟水吳江月
夢斷林楓歸路多

流水清音和子期停杯一笑看迷離不須更唱相思曲
已自難為錄別詩

樂意相催奈老何風懷轉較十年多柔腸一縷絲繚繞
肯為周郎盡意歌

吳苑風流散履裙清秋送遠憶行雲千林玉雪春如海

烟月梅魂定是君

八種魚 有序

楊公子有魚癖養金鯽數千頭悉是異種景西孝廉向余言之且謂無入詩者乃以其名品為八魚篇亦觀濠濮註爾雅之遺意云爾非必有所寄也托

溪魚擅異種鱗鬣耀黃金萍藻漾丹砂池沼息深深何

人佩魚袋朱緋明衣襟健羨生臨淵遠此濠上心 右朱魚

素儵亦羣游黝然守其黑得非洗硯池曾飲數斗墨離

離蚪蚪文粲粲金銀色吐墨以自蔽狡獪讓烏賊 右墨魚

汎汎盆盎玩厥貌郁有文渾以玳瑁裝五色元黃分膏

以明相煎象以齒遭焚孰是妾媵姿而與章服羣 右文魚

龍魚睥其目之而鱗甲殊炯炯爭夜光灼灼混驪珠安

知數寸質腥涎纒自濡龍門浪拍天風雷當有無 右龍魚一名挂珠

虎頭飛食肉豈其池中儔南山白額雄猥以目魚頭得

母類羊質乃矜文炳彪咄哉封使君懼為鯤鯨憂 右虎頭魚

羣魚啜玉缸金碧何媿媿中有水晶姿一色迷清泚素

月照銀鱗冰雪瑩肌理惟應姑射仙騎出烟波底 右水晶魚

游鱗腹彭亨賦貌圓於蜚就深尻益高負冰項仍短 此魚上下

水中如鯢鮠倘類族爾雅須更纂何人蜚子船投綸傍清淺 右蜚魚

魚

鰥魚夜不眠怪彼以行睡嬾性任沈浮不爭鬚鬣利江

海歎六鰲反側誰爲制尺水足臥游枕流亦肆志

右睡魚

詠白兔

皎皎中山族分茅附管城著書玄尚白八月影俱明雪
窖迷三窟金精瑩五兵狐狸應見嫉鷹隼莫相驚

代贈二首

醉眼明燈看謫仙春鶯水柳故依然十年不信徐娘老
占斷風情向管絃

曾向京江詠杜秋將軍腹負也風流若教管領閒風月
要自杭州勝潤州

和颯浴

水影香煙浩不分玉池清暖氣蒸雲冰肌瑩徹明燈裏
未必湘娥得似君

書別

對月三人秋夜長香銷燭暗遣離觴只愁十日寒江路
楓葉蕭蕭騷枕簟涼

雨中對菊

蕭槭傷秋晚清尊對菊叢燈明寒雨裏人老暗香中獨
酌情俱淡恬吟味略同落英仍可採未忍怨西風

初度前一日對酒二首

桐竹響深秋空階落葉稠移盆籬菊老聽雨夜燈幽緩

酌繙青史高歌笑白頭明朝五十一孤矢任悠悠
造物寧無意將衰詫此翁踈鐘秋夜裏朔雁雨聲中感
興看雄劍生涯味蓼蟲無成過半百長嘯對鴻濛

戲題張茂才卷

茂才病熱幾殆夢先賢端木子授以正心圖欽以方諸水而瘳屬其人繪圖一時題詠甚夥余異其事

並有取于雪岸不妄語之言作詩二首

等是蘧莊夢裏身何妨說鬼強因人隍中覆鹿柯南守
此事由來若箇真

寒熱紛拏病易餘清涼誰遣挹方諸君如佩服前賢訓
妄語邪心併掃除

戲題胡翁照二首

六十有兒諸事足柳枝桃葉未嫌多閒來作達狂呼酒
聽唱黃雞白髮歌

明月偏胎蚌殼珠新妝如畫費工夫稱觴昨日聞新語
我見猶憐况老奴

劉喬南撫軍閱視西征軍營疏請增屯轉餉兼以
老病自劾感興作四首

長驅萬里赴雄邊白髮書生已老年帶甲連營冰雪裏
更煩增竈議屯田

瀚海飛沙水草空雞皮凍損雪山風廟堂自有平戎策
垂死憂天笑此翁

甲仗旌旗映雪霜飛芻輓粟說羸糧夏蟲不到天山外
曾見冰堅八尺強

八十文淵困據鞍玉門生入請休官虛言無實空成笑
不殺依然漢法寬

走筆贈孫某

孫郎鐵筆工摹印自詡蛟龍鬱方寸頃來贈我三石文
欲追兩漢擬先秦新詩奇字各一軸詰曲聾牙不可讀
喜君刀法有獨造且置心聲論心畫往者此藝推何程
兩生去後誰最工讀書識字大難事古來絕技多奇窮
通侯都尉劇羊胃累累小印皆知貴中郎不作元常邈

二篆何人能髣髴孫郎出手誇絕倫掀髯欲笑世無人
人間藝事善相忌嫫母西施爭嫉媚昧畫鬼非易人非
難此物妍媸乃公器孫郎足跡徧寰中知己由來不易
逢我爲題詩聊一笑葉公曾不好真龍

讀木蘭山人任城秋傳奇題四絕句

多才潦倒歎違鄉太白樓高儘放狂誰惜金龜同一醉
可憐無復賀知章

鳴蟬森木夏如秋風雨南池記昔遊巢父不來高適老
無人獨倚謫仙樓

棄婦從來比逐臣誰從空谷問佳人一瓢浣筆清泉水

滌盡英雄失路塵

長歌當哭一牢騷池畔登樓氣自豪我有平生雙血淚
秋風濟水作波濤

題信昭蓬窓覓句圖

水柳依依陶峴舟焚香繡被劇風流蒹葭玉樹撩詩興
衰草寒烟惹客愁

題信昭我與我周旋圖

屈首青山鬢髮皤自言垂老日蹉跎逢人每笑此身贅
顧我應嫌一箇多形影未須勞贈答周旋亦莫問誰何
莊周蝴蝶俱虛幻只算書生寄籠鶯

和木蘭山人過淮陰釣臺韻

山人負才傲世不得志於東諸侯過釣臺賦詩見投淮陰城邊

秋瑟瑟淮陰市上無相識誰知一飯報恩人原是灘頭釣魚客

笑君錯鼓齊門瑟行到淮陰人不識且將一飯進王孫
憐渠不是諸侯客

步匠門太史寄懷韻兼懷北溟供奉二首

尺書附征鴻凌寒到江浦開緘一再讀悵然懷舊雨前
度混京華幾人論肺腑軟紅人海闊投足避榛莽戀戀
酒人游耳熱互今古荒雞號夜半壯心各起舞一錯鑄
六州鍊石疇為補衡門自屏跡優游謝珪組
平生湖海氣觸事猶未除夢裏排天閭願上太平書龍

蛇蟄歲宴冰雪將焉如側身自人間寧忍逃空虛悵望
素心侶中夜眇愁予平子寄相思爲報無瓊琚睠懷陳
仲舉遠致雙鯉魚平生知己言持贈良非譽

寒月

寒月如秋月深宵院宇清水光搖竹淨霜氣逼人明鄰
笛因風斷棲鴉顧影驚瓊樓天北極空軫白頭情

頑金笠屐小照二首

笠屐清標認大蘇酒豪詞癖自吾徒獼猴麟閣真何物
把卷行吟笑此夫

昂藏人共指狂儉雒誦還嗤老婢聲未信詩書定無用

一編落落且孤行

送友人之潞州任四首

郡古黎侯國山深潞子城陽春到五馬冰雪送雙旌勲
業劉安世襟懷尚子平政成宜臥理巖壑照人清

蜀道青天上湘源百粵西帆開九江遠

君先任蜀粵
轉九江也

雲接

太行低黃綬垂腰晚青峰繞郭迷宦遊身未老六十髮
如鑿

兵甲三關壯河山上黨強承平書吏課心迹映清漳治
譜傳經術賢聲副綠章古來清白守所至奏循良
曾走晉陽道停鞭識潞州地連三戰國星動五諸侯壺

口羊腸險長平濁水流馬陵榆社酒心折少年遊

瓶中蠟梅盛開

寒香融蠟淨得水倍精神獨擷兩枝秀先探十月春居
然素心侶相對白頭人冰雪知何力南簷暖日新

蔣荻劬寄示南樓讌集詩步韻奉懷三首

步荻劬韻

清詩疊唱酬聲律互相倚高調希韓孟皮陸非堪擬宣
城詩人國未審定誰比遙憶敬亭山翠色陵陽時使君
南樓詠日費幾番紙沈酣楓樹霞照映江烟紫先生抽
秘思韻冷澄秋水我懷宛陵秀

謂耦長
令君

楚榜秋江艤因循

復歲宴吟望空爾爾寒檠對佳什粲粲生紅蕊快意屠
門嚼臥遊心竊喜豪興發深宵夢落南樓裏

步耦長韻

宛陵憶諸梅伊人尚環堵海寓論耆舊如君幾拇數廿
年京洛晤襟抱曾一吐每從漁洋遊說君輒覩縷為我
寫松石蒼然生媚嫵孤雲敬亭秀崢嶸恣攬取江山歸
謝朓謂青士
太守臺榭互賓主觴筭集名賢文星當夜聚慨茲
風雅喪狂瀾力措拄載賡南樓章心神越江浦雲錦燦
筆花霞綺頽秋樹臨風懷李白今古一仰俯

步青士韻

陵陽山水鄉英賢聚如族誦君登樓作滌我塵千斛晴
霞染疊翠火傘雲旗簇耽佳翰謝守麗句悅衆目雅奏
遞訓荅楮墨亂肴菽千載北樓蹟盛事今乃復羣材輳
輪輿如輻共一轂我思敬亭遊舊好訪耆宿謂耦長師門
廿年契結念空繞腹別來成皓首每歎日車速往與太
守晤風雪鍾山麓人事有錯迕變遷相倚伏放情方外
適應笑轅駒促賡詩愛清音也覺才思屬蔣梅倚同調
聲叶伶倫竹樓上坐春風遠遊行可卜

至後感興

斗室假爐坐夜長寒灰暖意轉微陽梅融凍蠟舒初九
酒熟浮蛆動淺黃天地心宜回雨雪兵戈氣合殄戎羌
西征此日勞推轂絕塞弓刀赴敵場

挽窳亭二首仍用投贈舊韻

飄零湖海歎無家泡電浮生信有涯半世窮愁空叱鬼
千行醉墨剩塗鴉疎鐘冷寺依魂魄明月深樽想笑譁
守正未妨貧不足黔婁生不羨豪華

夜光樓迴記持觴把袂頻過聽鑰堂天忌才人窮作祟
吟耽好句韻工強墓門掛劔餘知已寒食清遊近醉鄉

遺囑葬之河北寒食春
遊故人為之掃墓也

剩有一編遺集在故應老我僭評量遺稿屬為

定點

雪夜二首

大雪宜三九深宵欲二更豐年明有象著地靜無聲孤
月寒相照幽人臥不驚中庭冷梅竹生氣看崢嶸
浙浙與堦平蕭蕭定徹明閒翻煨芋火寒掩讀書檠北
嚮初回雁西征未罷兵宵吟對樽酒頭白恥儒生

閒情

歲宴虛堂樂事偏掃除塵慮淨心田擁爐留客嘗新酒
呵凍濡毫賦短篇雪霽捲簾迎日坐梅開移榻就香眠
名場潦倒成何濟已負頭鬢半百年

雪中遣興十二首示玉岑

風雪茫茫欲暮天玉龍呈瑞又今年謝娘柳絮詩思好
廢却紅閨半夜眠

半卷殘書映素窗消磨未遣壯心降扁舟忽發山陰興
夢裏漁簑釣雪江

宴起三晨怕曉寒不關高臥比袁安十年伴食非吾事
芋火閒翻學懶殘

簇簇黃梅撚蠟新煖房香泛玉精神銷金帳底羊羔酒
較似圍爐品雪真

照眼松峰積雪明溪山如畫小盆清潤州西去江干路

記着王恭鶴筆行

冰玉千山大打圍黃麀錦雉塞垣肥承恩帳殿呼潼酒
醉詠新詩拜賜歸

臘月花房進牡丹瓊樓天上不知寒臣家也仗洪鈞力
綠萼先春一樹看

齋宿明裡紺殿遙五更風靜雪凝貂如今嬾漫山妻笑
布被蒙頭不早朝

大嚼屠門當解饒黃芽味美土酥甘六花天女飛多少
醉飽維摩共小龕

大澤龍蛇久閉藏地天疑戰正元黃勾芒太皞皆陽德

未信羣陰得主張

盈尺曾言兆歲豐東疇宿麥慰春農沙田二頃朝饗足
六印何須溷乃公

凍雪凝雲撥不開梅寒竹冷夜皚皚天公醞釀閒風日
火潑春光依舊來

歲暮戲作

意外追呼撥不開青蚨有翅肯飛來朗吟一笑稱奇策
掩耳如登避債臺

歲除三首

饋歲

生民重歲時饋遺資所有風人木瓜詠禮有苞苴久鄉
俗狗物情斟酌隨薄厚飽諳時世態取受寧能苟推減
或庶幾損益略相剖十年困家食頗亦計升斗平生利
濟心熟視空兩手虛堂長仗何物但有盈尊酒

別歲

天寒耽睡眠茲晨起獨蚤祀竈請比鄰肴馐雜鮮薨呼
兒陳棗栗勸客酌清醪日月兩跳丸西逝疾投鳥百年
過已半眼底人俱老煎膠繫長繩此意空縈擾不如拌
一醉取別姑草草歲去復歲來推遷任蒼昊

守歲

兒女惜歲除癡守不欲睡爆竹飲椒漿分曹恣嬉戲我
亦聽喧聒兀兀易成醉默念二十年仕隱堪一評毛髮
倏老蒼俯仰悲身世斗杓且東指韶景依然至來復見
天心陽和氣融洩立春恰七日矣鳴雞激壯懷抗聲歌櫪驥

